


Q. 129 (8⁶)

Xa
2991





OK 129 (86)

II, 614

2

Bericht / der Prediger
 in der Graffschafft Mansfeld / Der Ir-
 rungen halben / so zwischen ihnen / vnd etlichen Ge-
 larten / in Vniuersiteten / vnd sonst sich zuge-
 tragen / Auch worinnen / vnd wie fer-
 ne sie mit denselbigen
 streitig.



M. D. LXVIII.

*Heine Post
 Erdbeere
 1870*

B



M. D. LXXVIII.

3



sen/nach vnserm tragenden Ampte/etlicher reden
vnd lehren/die wir vnter vnserer befohlene Schreff-
lein/vnd vertrawete. Pfarfinder / nicht können
stillschweigend. ausgestrawet. werden lassen / ge-
dencken / Vnd auff dieselben mit gebürender be-
scheidenheit aus Gottes Wort vnser Bedencken
getrewer Wolmeinung setzen / vnd gegen die vn-
sern Warnungs weise dahin schliessen / Das sol-
chen neuen Reden vnd Lehren Beyfall zugeben/
nicht allein sorglich / Sondern auch hoch schendlich
Vnd derwegen viel sicherer vnd besser / bey den bis-
her gehabt/vnd durch D. Luthern Heiliger ge-
dechtuis/aus Grund vnd Göttlicher Schrift an
Tag gebrachten Lehren/vnd gefürten Reden ein-
feltig zubestehen vnd zuuerharren sein wolle. So
hätten wir wol gehofft / Es solte vns nicht allein
niemandes vmb des willen verdacht / Sondern
auch ganz vnd gar mit deme vnbeschuldiget / vnd
das vnzügemessen gelassen haben/das vns die zeit
vnserer lebens / niemals fürzunemen/in Sinn kom-
men ist. Denn ja vnserer Schrift vnd Bekenntnis
alda für Augen stehet / vnd vns gnugsam Verant-
wortet/vnd sich selbst Erklaret / das wir nicht mit
ganzen Landen / Kirchen vnd Schulen zusech-
ten vnd zustreiten fürgenommen / Sondern mit
etlichen Personen / anders nicht / denn wie sichs ge-
büret //

büret/ vnd von anfang in der Kirchen Gottes / im
Brauch gewesen ist/ conferirn/ vnd gegen ihre ein-
geführte lehren vnser Bedencken / mit Grunde
Göttliches Worts setzen/ vnd darauff das Urtheil
der Kirchen Gottes / vnd allen Bypartenschen
Gottesgelerten vnd Wahrheit liebenden Christen
heimstellen/ vnd ieder zeit solchs mit dem Erbieten/
Wenn vns vnser Gewissen/ die vns mit Gottes
Wort/ vnd klaren deutlichen Schrifften D. Lu-
thers eingenomen/ vnd gefangen sein/ mit gründ-
lichem Beständigem Gegenbericht / Auch aus
Gottes Worte / vnd gemeltes Mannes Gottes
Schrifften geschreyet werden / das wir nicht Hals-
starrig auff vnrecht gefasem Eigensinn / oder Ir-
thumb (dessen wir vns wie Gott weis/ mit dem ge-
ringsten nicht bewusst sein) verharren / Sondern
viel mehr mit Herzlicher vnd Christlicher Danck-
sagung der Wahrheit weichen/ vnd weisunge an-
men wollen. Vnd wüsten auch in Wahrheit nicht/
was wir vns mehr erbieten/ vnd thun könnten/ auch
was man mehr/ oder vber solches erbieten ferners
von vns billich begeren oder foddern solte. Denn
stracks zu deme zuschweigen/ das wir für vnrecht
erkennen / wil vns für Gottes Gerichte nicht
zuuorantwortten sein/ So wolte auch beschwer-
lichen fallen / vns das durch Gebot oder Ver-
bot

bot auffdringen zulassen / das dem Gewissen mit
Gottes wort vberzeuget / anzunemen / vntreglich
were / Welchs letzlich viel grössern vnracht mit sich
bringen würde / denn vielleicht bedacht / oder mit
kurzen Worten kan erzelet werden.

Weil vns aber dieses alles ein zeither / wenig
hat helfen wollen / vnd vber erzelten Bericht / für
vnd für / mit obgedachter Beschuldigung auff vns
gedrungen worden / Seind wir letzlich zu diesem
vnuermeidlich gedrungen worden / vns noch ein-
mal zu allem vberflus in einer kurzen deutschen
Schrifte zuentschuldigen / vnd klar vnd eigentlich
anzuzeigen / Warumb es denn alles zuthun sene
Mit welchen Personen / auch worin / vnd wie fern
wir vns eingelassen haben. Ob nu das etwas helf-
fen / vnd die Wahrheit vnd vnser Gemüt vnd Mei-
nung erkant / vnd nach Christlicher billigkeit ange-
nommen vnd gerichtet werden wolte.

Wir wollen aber alhie widerumb anfenglich
Demütig / vnd Vnterthenigst Bedinget / vnd Be-
zeuget haben / das wir jetzt so wenig als zuuorn /
vnd zuuorn so wenig als jetzt / damit Christliche
Vniuersiteten / Schulen vnd Kirchen / wollen Be-
schuldiget vnd Verdammnet haben / Wenn gleich
die Personen / mit denen wir aus Götlichem Wor-
te / vber etlichen Puncten vnd Stücken der Lehre /
vnd

vnd New eingefürten Reden Conferiren / derselben
Vniuersiteten / Schulen / vnd Kirchen Glied-
massen vnd Berwante sein. Denn wir (Gott
lob) wol wissen was wir von Christlichen Schu-
len halten / Vnd wenn schon eine Person oder
etliche / öffentlich mit Falscher Lehre vmbgienge /
das darumb den andern allen / so sich solcher
Lehre nicht theilhaftig machten / Solches nicht
könte oder solte / mit billigkeit zugemessen wer-
den.

So ist nue in vnserer gemeinen / vnd von vns
Einmütiglich vnterschribenen nechst Ausgegan-
genen Confession vnd Bekentnis Zwener Perso-
nen mit Namen gedacht worden / die vnter Höchst
gedachtem Churfürsten zu Sachsen / etc. In der
Vniuersitet Wittenberg / noch jetziger zeit Leben /
Lehren / vnd in den fürnembsten Ampten sein /
Nemlich des Herr Doctoris Pauli Eberi / vnd
Doctoris Georgij Maioris.

Des Herrn Doc. Eberi aber wird also ge-
dacht / das er Brüderlich vnd Freundlich mit gnug-
samer Reuerenz / vnd Ehrerbietung erinnere
wird : Das am Tage vnd vnleugbar sey / Er
thue ihme in seiner Vorrede / die er für sein
Bekentnis vom Hochwirdigen Sacrament /
in dem Lateinischen Exemplar gesetzt hat / in
A iiii deme

deme zuuuel/ Das er mit so harten / geschwinden/
ernsten/ vnd vielen Worten/ die reinen Lehrer der
Sechsischen Stedte/ vnd andere beschuldiget/ Als
sein sie mit irem schreiben wider die Sacramenti-
rer/ die größte/ vnd fast einige vrsache/ das nicht al-
lein vielfeltige Spaltung vnd Zerrüttung in vn-
sern Kirchen entstanden / Sondern das auch viel
armer vnschuldiger Christen/ in Franckreich/ vnd
anderst wo / so jemmerlich / vnter dem schein / als
wären sie die Ergesten vnd Verdammlichsten leute/
Erwürget vnd Ermordet werden.

Vnd sey solch Schreiben vnd Streiten/ wider
die Corruptelen/ vnd sonderlich wider die Sacra-
mentirer/ ein vnzzeitiges Verdammen / Vnschül-
diger Armer leute / vnd nichts anders / denn ein
Auffblasen vnd Anschüren des Feners/ damit die
Armen vnd Betrogenen leute/ ohne allen vnter-
scheid vnd erbarmen/ von den Feinden der War-
heit den Papisten Ermordet werden. Wie denn
die vielfaltigen gewlichen amplificationes strack
dahin gehen/ das der Herr D. Eberus/ dieselben
Lehrer / so den Sacramentirern etwas heftiger
vnd ernstlicher Widersprochen/ vnd iren Irthumb
aus vnd mit der Schrift vberzeuget vnd verdam-
met haben/ bey aller menniglich in den Verdacht
vnd Feindschafft bringe vnd setze/ Als geben sie sich
selbst

selbst für solche leute aus/das sie Homines terrifico
zelo præditi, weren treffliche Ritter vnd Helden/
die für andern ein Herze haben / wider falsche Le-
re zu streiten/sich niemands zuebarmen / vnd so
steiff vnd dapffer/ja so vnbarmerzig/das sie auch
mit den vnwissent verfürten leuten kein mitleiden
in irem Elend haben konten/etc.

Vnd weil wir gesehen / das vnter vnd mit so
harter Beschuldigung unsere Vorfahren / vnd
zum theil wir selbst angerüret worden/ ist es vns
nicht wenig zu Gemüte gegangen/vnd haben den
Herrn Doctorem Eberum (wie gedacht) Brü-
derlich dessen erinnert / vnd ihme angezeigt/das
er vnsern einfeltigen bedüncken nach / hieran zu
viel thete.

Erslich darumb / Das ja gewis vnd war ist/
das der Sacramentirische Irthumb ein schedli-
cher vnd straffbarer Irthumb ist / deme billich alle
Erewe Lehrer / mit allem fleis vnd Ernst wider-
sprechen sollen.

Zum Andern / Das es die Historia klar gie-
bet / das den streit vom Sacrament nach D. Lu-
thers Tode/ nicht die so wider die Sacramentirer
gestritten/ Sondern sie selbst die Sacramentirer
wider ernewert vnd angefangen haben/ vnd also
die vnsern zum Widersprechen gedrungen worden
B sein

sein dessen sie lieber vbrig gewesen weren / wenn es die auff den Vniuersiteten / den es wol am meisten gebüret / gethan hetten.

Zum Dritten / das in solchem widersprechen / nicht die armen vnwissent verführet / vnd der Warheit begirige Herzen / sondern die Halsstarrigen verfechter des Irthums / als Calvinus, Bullinger, Martyr, Beza, Lasco, Boquin, Hardenberg, vnd andere ernstlich gestrafft worden sein / Mit denen man dennoch nicht wider gebürlichen Proees ist vmbgangen / dieweil sie zuuor von Luthero / vnd andern genugsam erinnert vnd vermanet worden sein / che man sich von ihnen gantzlich abgesondert / vnd sie aus der einigkeit der Augspurgischen Confession gesetzt hat.

Zum Vierden / Das auch wir selber einen deutlichen vnd gründlichen bericht zur lehre / für die einfeltigen gemeinen Christen / aus dem Heiligen Catechismo Lutheri in Lateinischer vñ Deutscher Sprache gestellet / vnd der ort / verschickt haben / nicht der meinung / das wir für andern Ruhm suchen / oder auch jemandes verdammen wolten / Sondern den Einfeltigen / die es besser nicht wusten / Christlich vnd Brüderlich zu dienen / Auff das die jenigen / so der Warheit begierig weren / vnterweiset / vnd für den listigen vnd Betrieg

trüglichen grieffen/ vnd scheinbarlichen fürgeben
der Ausbreiter des Sacramentirischen Irthums
verwarret wurden.

Das nu solches alles so gar beschwerlich an-
gezogen / vnd solch wolmeinend vnd den getrewen
Lehrern gebührendes Fürnemen / vnd Werck / eben /
vnd allein darumb so schrecklich eragittiret / vnd
auff vbelste angenommen / vnd gedeutet werden sol-
te / das es der Teuffel in seinen Papisten zu seinem
Tyranischen Morden misbrauchet / ist vns ja
zu Gemüte gegangen / vnd haben wir bey vns
nicht finden können / das es Brüderlich / recht vnd
wolgethan were / noch auch freundlich mit denen
vmbgegangen hiesse / die man sonst keines vbeln
zubeschuldigen / noch anders denn für Brüder zu
halten vnd zuachten haben solte. Sonderlich die-
weil man anders nicht darthun können wird /
denn das vnter solchem streite / die errettung der
Warheit / vnd vnschuldig versürter leute wider-
bringung gesucht / vnd nichts anders widerholet /
gelehret vnd geschrieben ist / denn was zuuor Lu-
therus / vnd andere vnserer lieben Preceptores auch
wider die Sacramentirer mit hohem Efferigem
Geiste gelehret vnd geschrieben haben. Wir haben
aber dasselbe erste stück vnserer Demütigen vnd
Brüderlichen erinnerung an den Herrn Doctor

B ij

Ebe

Eberum mit diesen Worten beschloffen: Itaq; de eo
iam D. Doctorem Eberum fraterné & reuerenter
commonefacimus, & amanter oramus, ne commo-
nefactionem hanc vel negligat prorsus, vel alio quàm
facta est animo suscipiat. Das ist: Derhalben wir
den Herrn D. Eberum mit aller Ehrerbietung
Brüderlich erinnern / vnd freundlich bitten / das
er diese vnserere Vermanung nicht gantzlich verach-
ten / noch auch von vns anders / denn sie gemei-
net / annehmen wolle. Aus welchem man ja nicht
schliessen oder erzwingen / vnd vns vnfreundlich
wird zumessen können / das wir hiemit die Uni-
uersitet Wittenberg wolten geschmehet oder ver-
dammet haben / weil wir derselben mit keinem
Worte gedacht / vnd wir auch diese Person zuschme-
hen / oder vngedürlich anzutasten / zum fleissigsten
vermieden haben. Für eins.

Zum Andern / haben wir von dem Bekenntnis
des Herrn D. Eberi vnserere aufrichtige deutliche
Meinunge gesagt / Das wir nemlich mit derselben
Herzlich zufrieden weren / vnd Gott dafür dan-
cken / das sie heraus komen ist / darinnen vns dieses
Erstlich wolgefellet / Das er in seinem Gewissen
mit der Sacramentirer Lehre nicht habe zusrie-
den sein können. Zum andern / das er Doct. Lu-
therslehre vom Heiligen Abendmal / vnd sonder-
lich

lich von der waren Gegenwertigkeit des Leibs vnd
Bluts Christi/ trewlich füret / vnd vnter andern
schreibt/ das es war ist/ (wie auch Lutherus sagt)
Das im brauch des Heiligen Abendmals / die
Gleubigen Christen/ den Wesentlichen Leib Chri-
sti / nicht allein mit dem Glauben Geislich/ Son-
dern auch mit dem Munde leiblich empfaben. Vñ
das derselbe Leib nicht allein da sey/ vnd empfan-
gen werde von den Wirdigen/ zu irer Seelen Heil
vnd Seligkeit/ sondern auch von den Vnwürdigen
zu ihrer Verdammis/ etc. Zum dritten/ Das er die
Caluinische Sophismata / damit sie das gegen-
theil vertheidigen/ deutlich vñ gründlich verwirfft
vnd widerleget / Vnd also dieser lande Kirchen
wider ihre bissher ihnen zugemessene Calumnien/
schützet vnd verantwortet.

Nach dem aber auch gedachter Herr Doctor
Eberus / in sezt gemelter seiner Bekenntnis/ da er
von denen die das Sacrament vnwürdig empfa-
hen redet/ einen neuen vnterscheid gemacht/ Das
dieselben vnwürdigen Empfaher auch Zweierley
werden/ Also: Das ezliche wol den Leib vnd Blut
des HERREN Ihesu Christi empfangen/ vnd an
demselben schuldig würden / Ezliche aber mehr
nicht denn schlecht Brot vnd Wein ohne den Leib
vnd Blut Christi bekemen. Ist vns diese abthei-

linge / weil die zuvor in vnsern Kirchen vngereuchlich / vnd unbekant gewesen. verwunderlich fürgefallen / das wir darüber gestuzt / vnd zum nachdencken geursachet worden sein. Vnd haben sie derwegen / ehe wir sie angenommen / auff den Probierstein Göttliches Worts / vnd Doctor Luthers Schrifften legen müssen / das wir sehen / ob sie nach Gottes Wort bestehen wolte / oder nicht. Als aber solchs geschehen / haben wir befunden / das es bedenklich sein wolte / in jetzigem zustande der Kirchen dise Newe vngereuchliche / vnd zuvor vnerhorte abtheilung schlecht hin anzunehmen / Aus den vrsachen : Das zum ersten mit solcher Newerung andern / vnd sonderlich denen / so den Sacramentirischen Irthumen nicht vngewogen seind / anleitung gegeben wurde / auch ohne sonderliche bedencken von gereuchlicher lehre abzutretten / vnd dergleichen newerung zusuchen / vñ sich in ihren Sacramentirischen Reden vnd meynungen zubehelffen vnd zuschmucken. Zum andern / das es sich ansehen liesse / als solt das das mittel sein / dadurch der Sacramentirer lehre / damit sie Christus waren Leib vnd Blut vmb der Vnwürdigen willen / ganz vnd gar vom Abendmal ausschliessen / etlicher massen entschuldiget. Vnd Doctor Luther vnd andere der vnsern / die bissher Ernst-

Ernstlich dawider gestritten/ beschuldiget werden
können / als hetten sie der sachen zu viel gethan/
in deme sie gestritten hetten/ Das die unwirdigen
GHRZSEBS Leib empfangen/ Sintemal nu
durch D. Eberum erwiesen würde/ Das nicht alle
so zum Sacrament kommen / den Leib vnd Blut
Christi empfangen. Zum dritten / Das es fast mit
dieser Theilung da hinaus leufft / als solte die ge-
genwertigkeit des Leibs vnd Bluts Christi in sei-
nem Heiligen Abendmal nicht auff Christi Wor-
ten vnd Ordnung / Sondern der Person die es
empfehet/ stehen/ Siweil ein solche Person dazu
kommen kan/ der Christus sein Leib vnd Blut nicht
mittheilen wolle. Zu welchen wir noch mehr Ur-
sachen in vnserer Bekentnis gesetzt / vnd darauff
Doctor Eberum gebeten / das er vns hierinne
nicht verdenecken wolle/ weil wir die vrsachen / die
vns von solcher theilung abhielten/ nicht gering-
schetzig halten könnten / vnd in Gottes Wort ge-
gründet funden. Vnd beschlieslich erinnert / Das
er selbst diesen sachen besser nachdencken / vnd
sich verhalten wolte / das vber solchen eingefür-
ten Neuerungen nicht andere vnd neue Gezenck
erregt werden dörfften. Damit wir abermals
keines weges die Person / die wir vnsern Bruder
nennen / vnd auch anders nicht denn Brüder-
lich

lich Vermanen/ Verdammen/ Sondern zu erret-
tung vnsers Gewissens / vnser Bedencken nach
Götlichem Worte auff öffentlich im Druck aus-
gegangene Lehre/ entdecken/ vnd dauon/ wie vnse-
re Wort lauten/ Fraternal Bröderlich vnd freund-
lich conferiren / Vnd können demnach Bericht
vnd weisung wol leiden vnd annehmen.

So viel vnd fern haben wir bisher mit dem
Herrn D. Ebero zu thun gehabt/ vnd ist vns noch
zur zett in Sinn nicht kommen/ vmb des willen/
die Vniuersitet Wittenberg zu seinden/ zu lestern/
oder zuverdammen.

DIE ander Person ist (wie zumor gedacht)
Doctor Maior: Deme haben wir etwas
ernster vnd Herter zugesprochen / Vnd ist
solchs daher kommen: Anno 1558. hat er sich in
seiner erklerung erbotten/ Er wolle seine Propo-
sition Gute Werck sein zur Seligkeit nötig/
vmb frides willen fallen lassen / vnd an stad der-
selben andere Wort der Schrift führen vnd brau-
chen. Etwa vier Jhar hernach/ Anno 1562. als
er erfur/ das die Sechsischen Theologen/ in ihrer
zu Lüneburg gestelten Erklerungs schrift/ auch
dieser seiner Proposition gedacht vnd dieselbe als
falsch/ vnrecht vnd Papistisch verworffen hetten/
ward

ward er vber die massen zörnig / vnd fuhr mit einer
gar wütenden Prefation vber seinen Homelijß
heraus / liesß dieselbige Lateinisch vnd Deutsch
Drucken. Darinnen schrieb er mit den aller heff-
tigsten vnd vermessensten Worten / das er niemals
ein einiges Haarbreyt oder mit dem geringsten
Buchstaben / auch in vertheidigung dieser Reden /
Das Gute werck zur Seligkeit nötig sein.
von der Reinen Lehre / die Gott durch Doctor Lu-
thern wider an Tag gegeben / abgewichen were /
Vnd schalt vnd lesterte vnerhorter weise / alle die
solcher seiner Papistischen vnd Interimistischen
Rede je widersprochen haben / auff das aller grau-
samste / als er nur erdencken kunte / Hies sie Sy-
cophanten / Lügner / Mordgeister / Auffrörer vnd
Lesterer / etc. Vnd wolte es gar nicht gestehen /
Das er solche Proposition in seinen Lektionibus /
Predigten oder Büchern also geführet / das er sie
jemandt habe auffdringen / oder dieselben in fal-
schem oder vnrechtem Verstand vngewürlich ver-
theidigen wollen.

Auff dieses haben wir nicht schweigen können /
Weil solche D. Maiors hefftige Scheltwort / vns
mit betroffen / als die wir es viel anders gewußt /
vnd seiner Proposition zuuor auch mündlich vnd
Schrift-

S

Schrift

Schriftlich widersprochen hatten/ Haben derwe-
gen in gedachter unserer uechsten Bekenntnis Drey
stücke gegen seine zornige Prefationschrift gese-
set. Im ersten ist vnter anderm die Historia erze-
let / wie hefftig er solche Proposition bey vns zu
Eisleben auff dem Predigstuel vnd sonst/ wider vñ
vber vnser demütiges vnd vielfaltiges bitten/den-
noch mit grossem Troß getriben. Vnd haben be-
weist/ wie vnd worin solche Rede/warhafftig/an
ir selbst falsch vnd Papistisch ist/vnd wider die rei-
ne Lehre der heiligen Göttlichen schrift der Aug-
spurgischen Confession / ihrer Apologia vnd D.
Luthers Schriften eigentlich streitet. Zum andern/
haben wir etliche Ursachen vermeldet / Warumb
man mit derselben seiner vorigen Declaration vñ
Bekenntnis nicht wol könne genüget vnd zufrieden
sein/weil er je so hefftig darumb zürnen wolte/das
seine Proposition angegriffen/vnd für vnrecht ge-
halten würde. Zum dritten/haben wir kurtzlich zu
errettung unserer vnd anderer Vnschuld etwas
doch auffskurtzte/ auff die grewlichen Scheltwort
vnd Beschuldigung geantwortet.

Damit aber haben wir auch noch nicht die
Kirche / oder Vniuersitet Wittenberg angreifen/
noch der selben in vngutem oder anders/denn sichs
gebüret/ gedencken wollen/ Denn wir die eingefür-
ten

ten Maioristischen Reden niemand anders denn
ihrem Autori vnd Defensori zugemessen haben, vnd
dieselben bey ihm bleiben lassen.

Nach dem er aber widerumb mit seiner Erkle-
rung herfür kommen, vnd dieselbige Repetiret, vñ
widerholet hat, vnd vnter anderm, in derselbigen
Repetitionsschrift, den Anfang vnd die Ursa-
chen des erhobenen, langwirigen vnd schedlichen
Streitens vber seinen Propositionen, auch alle
Zerrüttung so damit verursacht oder angerichtet,
vnd alle Sünden, so dadurch begangen, so gar
von sich schieben, vnd aller ding, gar rein vnd vn-
schuldig sein wil, Ist mit einfeltiger gründlicher er-
zelung der Historien klar dargethan, wie sichs al-
lenenthalben hierumb verhalte, Vnd in solcher Er-
zelung, ist vnsers verhoffens nichts vngewürliches
fürgenommen, niemand geschmehet, niemand et-
was entgegen oder zuwider geschehen. Man wol-
te denn das für vngewürlich achten, das den vn-
wissenden zu Bericht, vnd zu Errettung Göttli-
cher Ehren, die Wahrheit, mit aller gelindigkeit
endecket, vnd an tag gegeben worden ist.

Es ist aber mit diesem ganzen streit vber viel
gedachten Doctor Maiors Reden, nu so weit, vnd
ferne komen, das es alles auff nachfolgenden Pun-
cten ruhet vnd stehet.

G ij

Zum

Im ersten nimpt man von ihm für
Bekent an: 1. Das er in seiner zornigen
Oration die er zu Wittenberg / Anno 1567. den
18. Octobris / im abgang von seinem Rectoratu
gethan hat / die Proposition / Bona Opera sunt ne-
cessaria ad salutem, Gute Werck sein zur Seligkeit
nötig / orationem ambiguum, eine zweiffelhafftige
vngewisse Rede nennet / die man auff beide seiten
lencken vnd deuten könne. 2. Das er auch in der
selben Oration schreibet / aliquos propter ambigui-
tatem huius orationis fuisse offensos, Das sich etliche
an solcher zweyfaltigen vnd vngewissen Rede ha-
ben geergert. 3. Das er allen Papistischen vnd
Falschen verstand / der in solcher Proposition pro-
pter ambiguitatem stecken mag / ernstlich vnd heff-
tig verwirfft vnd verdammet / vnd schreibet aus-
drücklich: Das solcher falscher verstand vnd lehre /
„ nicht allein zu Schmach vnd verkleinerung der
„ Ehren Christi / vnd des Verdiensts seines bitteren
„ Leidens vnd Sterbens / sondern auch zu verwir-
„ rung vnd verkerung alles Christlichen Trostes /
„ vnd aller anruffung betrübter vnd bekümmertter
„ Gewissen gereiche.

4. Das er vnter anderm (da er sich lange die
schult erregter Zwispalt von ihm zuwenden / ge-
enstet) eine solche Erklarung vnd Bekentnis von
dem

dem Artikel der Rechtfertigung vnd der Guten
Wercke thut/ die der Schrift der Augspurgischen
Confession / Apologia/ vnd D. Luthers Schrift-
ten gemess ist.

Dieses alles (wie gedacht) nimpt man von
D. Maiorn bekant an / giebt es ihme auch gerne
zeugnis / vñ were in denen erzelten stücken wol mit
ihm einig vnd zufrieden. Hette nu hie D. Maior
fort gedruckt / vnd warhafftig ein Friedliebendes
Herz vnd Gemüt gehabt / vnd dem Streit vnd Zwie-
spalt gantzlich abhelffen / vnd alles fernere Zancken
verkommen / abschneiden vnd auffheben wollen /
so hette er es leichtlich thun können. Vnd were
völlent darumb zuthun gewest / das er mit geradem
Munde vnd reinem Herzen heraus bekennet / das
diese Proposition / Gute Werck seind zur Selig-
keit nötig / Vnd die andern anhangenden : Das
vnmöglich sey / one Gute Werck selig werden / vnd
sey auch niemand ohne Gute Werck selig worden /
an ihnen selbst / wie sie Natürlich lauten / nichts
tügen / vnd dem fürbilde der gesundenlehre / vnd
heilsamen Worten nicht gemess sein / vnd das auch
nicht aller Verstand vnd Erklerung / der in feruore
contentionis in der Hitze dieses streites geführt wür-
den / gut vnd recht / Sondern das ihm etliche Expli-
cationes entwischt / vnd mit vntergelauffen weren /

G iij

die

die nicht alle töchten / die er auch nue / mit den gedachten Propositionen hinlegen / vnd mit Bitt vmb verzeihung wolte abgethan haben / Vnd hette darauff solches Specificiret vnd erkleret. Denn solte vnsers verhoffens der sachen vollend gerten / vnd genzlich abgeholfen worden sein.

Weil aber das nu nicht geschehen ist / so müssen wir vmb Berichts willen anzeigen / Woran denn noch der mangel stehet / das es an den oben erzelten stücken / die man von D. Maiorn für bekant annimpt / nicht genug ist / vnd noch der streit nicht kan oder mag hingelegt werden / Vnd wollen diesen bericht nicht darumb thun (darüber wir Gott mit gutem gewissen zu Zeugen anruffen) das wir liebe oder lust hetten zu Zancken / oder Doctor Maiorn genzlich wie er es pfleget zu nennen / zuuerdrücken vnd zubeschemen / Sondern das solches die not der Kirchen / die errettung der Wahrheit / vnd vnser Ampt vnd Gewissen also von vns erfordert vnd erzwinget /

So selet vnd mangelt es nu
noch daran:

I. Das Doctor Maior zürnet / vnd vbel zufrieden ist / das man sagt / Die Proposition: Gute Werck seind zur Seligkeit nötig / sey an ihr selbst

selbst/ nach ihren Worten vnd Natürlichem Ver-
stande Falsch / Vnrecht Papistisch / vnd verwerff-
lich / aus der Ursache / das sie dem Fürbilde der Ge-
sunden Lehre / vnd Heilsamen Worte / nicht ehn-
lich / gleich vnd gemess sey.

Das wiler nicht alleine / nicht für sich sagen /
vnd bekennen / sondern wils auch nicht leiden / das
es andere sagen vnd schreiben / Wo mans aber
thut so heist vnd nennet ers Calumniren / falsch
deuten / lestern vnd schenden. Nu kan vnd soll er-
wiesen werden / das diese Rede an jr selbst. Falsch
vnd dem Fürbilde der Gesunden Lehre vnd Heil-
samen Worte nicht gemess ist / noch mit den selben
vbereinstimmet vnd eintrifft.

Das Fürbilde aber Gesunder Lehre vnd
Heilsamer Worte ist dis.

S Paulus Roman. 4. Die Seligkeit ist al-
lein des Menschen / welchem Gott zurech-
net die Gerechtigkeit / on zuthun der werck.

Ephes. 2. Aus Gnaden seit ihr selig worden /
durch den Glauben / vnd dasselbe nicht aus euch /
Gottes gabe ist es / nicht aus den Wercken / auff
das sich nicht jemand rühme.

In der Augspurgischen Confession wird aus
dem alten Lehrer Ambrosio / das fürbild der gesun-

den Lehre vnd Heilsamen Wort eingefüret / vnd also
gesetzt: Also lehren auch die Väter. Denn Ambrosius
spricht: Also ist beschloffen bey Gott / das
wer an Christum gleubet / selig sey / vñ nicht durch
Werck / Sondern allein durch den Glauben / ohne
Verdienste / Vergebung der Sünden habe.

Doctor Luther. Der Artickel von der Christlichen
Gerechtigkeit ist / das wir für Gott gerecht
vnd selig werden / durch den Glauben an Christum
ohne zuthun aller Werck / auch der Vernewerunge
/ nicht das dieselbige nicht folgede / oder folgen
solte / sondern das man sie nicht in den Artickel
der Rechtsfertigung mengen soll.

Das nue die Proposition / Gute Werck seind
zur Seligkeit nötig / diesem Fürbilde der gesunden
Lehre / vnd Heilsamen Wort nicht ehnlich vnd gemess
/ sondern zuwider vnd falsch sey / ist daraus
klar .

1. Das die Wort stracks wider einander sein /
Wercke sein zur Seligkeit nötig / Vnd / nicht aus
Wercken / sondern ohne zuthun der Wercke / ist vnd
wird man selig. Sie darffs keines Glosirens / ein
jeder verstehets selbst wol / Ja es wil sich in diesen
klaren Worten / gar nicht glosieren oder deuten
lassen.

2. Das das Wort / Nötig / natürlich ein Cau-
sam

Samoder Ursache eines dinges einschleust. Ist et-
was zu ein dinge nötig/ so kan es ohn dasselbige
nicht bestehen / noch verfertiget werden. Seind
Wercke zur Seligkeit nötig/ so kan man ohne die-
selbigen nicht selig werden / Wie es denn Doctor
Maior also mit einer andern Proposition erkle-
ret / da er spricht: Es ist unmöglich ohne Gute
Werck selig werden. Daraus wil gewisslich fol-
gen/ Das die Guten Werck etwa ein vrsach un-
serer Seligkeit/ vnd also ein Verdienst sein müs-
sen. Dieses aber ist den nechst gesetzten Sprüchen
zu wider.

3. Das solche Rede des Papssts ist/ von dem-
selbigen herfleust/ vnd gar nicht anders von ihm
gebraucht ist/ denn wie die Wort natürlich an ihm
selbst lauten/ das die Wercke zum Verdienst der
Seligkeit gehören. Vnd ist auch darumb ins
Interim von Julio Pflug/ vnd Sydonio/ das da-
mit der Artikel von der Rechtfertigung des
Menschen verfelschet/ vnd auff Papistischen Ver-
stand gelencket werden soll / gesetzet vnd eingefli-
cket worden.

4. Das vffm Concilio zu Trient ein grosses
Trolocken darüber gewesen/ das man gehört / wie
solche Rede/ Gute Werck sein nötig zur Seligkeit/
von den Verwandten der Augspurgischen Con-
fession

Q

fession

fession geführet/ vnd vertheidiget würde. Das auch
einer aus ihrem mittel öffentlich geschrieben: Wenn
wir nu also anfangen zureden/ so würden wir wol
bald dem Papstumb neher kommen / vnd mit der
zeit aus einem munde mit ihn reden/ Aus welchem
gnug abzunemen ist/ wie die Papisten diese Rede
halten/ So habens auch die Exempla Stephani
Agricolæ vnd Lauterwalds ausgeweiset/ Wo sol-
che Reden entlich pflegen hinaus zulauffen.

5. Haben der Herr Philippus Melancthon
in dem 24. Bayerischen Artickel im Corpore Do-
ctrinæ, Menius vnd Alesius Psalm. 13. selbst nicht für-
uber gekunt/ sondern bekennet/ Das solche Rede
natürlich das MERITVM einschliesse/ Wie wir in
vnserm warhafftigen Gegenbericht auff D. Ma-
iors Repetition ferner ausgefüret. Menij wort sind
man in vnserm Gegenbericht auff D. Maiors Re-
petition. Alesij wort sind diese: Hoc tantū obiter di-
ctum est, propter nouam Sophisticam, qua defenditur
ista: Opera sunt ad Salutem necessaria. Nos ad hanc So-
phisticam aures obstruamus & audiamus Prophetā no-
bis concionātem: Ego autem in misericordia tua confi-
do, Gaudebit cor meū in salute tua &c. Cantabo Do-
mino, qui persoluit pro me. Bone Christe quid si Pro-
pheta vel Latro in Cruce, quem contendunt habuisse
tot Bona opera, audiuisent istos Vociferantes Bona ope-
ra sunt ad Salutem necessaria. Das

Das ist vngesefhrlich so viel gesagt:

Dieses ist beyleufftig gesagt / vmb der Neuen Sophistery willen / das man jetzt vertheiget / Gute Werck sein zur seligkeit nötig. Wir sollen billich für solcher Sophistery unsere Dren zustopffen / vnd hören / was der Prophet Predigt: Ich aber (spricht er) trawe auff deine Güte, mein Hertz wird sich freuen in deinem Heil. O du Gütiger Christe, was wolten doch darzu gesagt haben dieser Prophet / oder der arme Schecher am Creutze (von dem sie sagen / das er viel Guter Werck gehabt) wenn sie dis geschrey gehört hetten / das man sagt / Gute Werck sein zur seligkeit nötig.

6. Das entlich Doctor Luther diese Rede gewaltig vnd offemals aus vnsern Kirchen ausgemustert / vnd sie nicht hat leiden wollen. Davon seine öffentliche gehaltenen Disputation / vnd viel seiner Schrifften zeugen. In disputatione de Iustificatione Anno 1536. Vuittenbergæ habita. Dicere: OPERA ESSE NECESSARIA AD SALVTEM. Est dicere: Quod Christus sit Saluator inchoatiue, non perfectiue. Item est tribuere Christo & fidei quod minimū est, operibus quod maximum est, Christum requirere ad Iustificationem tanquam minimam causam, opera autem bona, aut nouam obedientiam requirere ad Sa-

D ij

lutem,

lutem vt maximam causam. Cauete vobis ab istis Argumentis, quia hoc fit inde, quod Christus amplius nunc non sit Saluator, sed spolietur suo honore, quod non fecerit nos iustos sua morte, cum ipsi nostris operibus vitam æternam possimus impetrare, istæ absurditates caliginem inducunt mentibus hominum, præsupponunt enim quod Christus non debeat esse Saluator &c. Als wolt er sagen: Wenn man also redet, Gute Werck sein zur Seligkeit nötig, Ist eben so viel gesagt, Als sey Christus weiter vnser Heyland nicht, denn so viel allein den anfang belanget, aber nicht auch zu ganzer volziehung derselben. Item, Es heisset Christo vnd dem Glauben das wenigste in der Rechtfertigung zuschreiben, den Wercken aber das meiste zueignen, Ja Christum für die geringste vrsache, Die Guten Werck aber vnd Newen Gehorsam, für die größte vnd fürnehmste vrsache, vnserer Gerechtfertigung anziehen. Hütet euch für solchen Argumenten, Denn das erfolget daraus, das Christus nu mehr weiter nicht vnser Heyland sey, Sondern wird seiner gebürlichen Ehre beraubet, als der vns nicht Gerechtmacht habe durch seinen Todt, dieweil wir mit vnsern Guten Wercken das Ewige leben können erlangen. Solche vngereimte Rede verdunkeln vnd verführen rechten Verstand in der Menschen
Herz

Herken / Denn sie bringen aller dienge mit sich /
das Christus nicht solle der rechte Heyland / oder
Seligmacher sein. Mehr Zeugnis findet man in
vnsrer nechsten Confession.

Weil aber nue Doctor Maior stracks das
Widerspiel helt / vnd heist solches (wie gedacht)
mißdeuten / verkeren / calumniiren / vñ darzu schen-
den vnd lestern / vnd wil seine Proposition für
rein vnd rechtschaffen gehalten haben / So kan
man ja keines weges mit ihm zufrieden sein. Man
wolte denn wider öffentliche Warheit / vnd oben
eingeführte Sprüche der Schrift / vnd Augspur-
gischen Confession handeln / D. Luthers vrtheil
vnd meinung stracks fahren lassen / vnd für nichts
halten / sein Gewissen beschweren / Schwarz Weis
vnd Weis Swartz / oder wie die Schrift redet /
Gutes Böse / oder Böses Gut heissen. Welches
grewliche schwere Sünde / vnd von Gott ernstlich
verboten ist / auch ein schweres Vrtheil vnd Ge-
richt mit sich bringet / Wie Esaie 5. geschrieben ste-
het: Wehe denen / die Böses Gut / vnd Gutes Böse
heissen / Die aus Finsternis Liecht / vnd aus Liecht
Finsternis machen / ecc.

Das ist eins / daran es mangelt / Warumb
man noch nicht kan mit Doctor Maiorn zusrie-
den sein.

D iij

Das

II. Das Aunder ist/ Das er Vermes-
sentlich sagen darff/ das diesen seinen Worten/ Gu-
te Werck sein zur seligkeit nötig/ viel Sprüche der
Heiligen Schrift gemess sein / gerade / als were
kein vnterscheid zwischen denselbigen Sprüchen
vnd seiner Proposition/ Vnd wil fast so viel schlies-
sen/ das in denselben eben der Falsche/ Vnrechte/
vnd Papistische sinn vnd meinung stecken solle/
der in seinen Reden steckt / vnd befunden wird/
Vnd machet derselben Sprüche etliche Namhafft-
tig/ Als nemlich/ Romanor. 6. Nue ihr aber seid
von der Sünde frey/ vnd Gottes Knechte worden/
habt ihr ewre Frucht/ das ihr Heilig werdet / das
Ende aber das Ewige leben.

Roman. 10. So man von Herzen gleubet/
so wird man Gerecht/ vnd so man mit dem Munde
bekennet/ so wird man Selig.

Ephe. 2. Aus Gnaden seid ihr selig/ etc. Denn
wir sind sein Werck/ geschaffen in Christo zu Gu-
ten Wercken/ zu welchen vns Gott zuuor bereitet
hat/ das wir darinnen wandeln sollen.

Johannis 5. Die so Gutes gethan haben/
werden herfür gehen / zur Auferstehung des Le-
bens/ die aber Böses gethan haben/ zur Auferste-
hung des Gerichts.

Das nue diese vnd viel andere Sprüche da-
von

von reden/ Das die Gleubigen Gute Werck thun/
darzu sie Gott geschaffen/ durch den H. Geist im
Wort vnd Wasser new geboren/ vnd zuuor berei-
tet hat/ vnd das sie mit ihren Guten Wercken iren
Glauben/ als durch rechtschaffene Früchte der hei-
ligung beweisen/ Auch das Got nach seiner zusage
in diesem vnd jenem Leben/ die rechtschaffene Gute
Werck werde belonen/ das ist man mit D. Maiorn
wol eins/ Wie auch des/ das man solche sprüche zur
vermanung vnd anreizung zu guten Wercken vñ
einem Newen Christlichen leben/ Vnd dagegen
das si here Antinomische wesen der leute zustraf-
fen/ vnd Gottes Zorn vnd Ewige verdammis dar-
über zuuerkündigen/ führen vñ gebrauchen vnd an-
ziehen möge/ etc. Aber das ist ja traum zuuuel/ vñ ein
grewliches Sacrilegium, das er sie seiner orationi am-
biguæ, der vngewissen zweyhüingigen Papistischen
rede gleich setzet/ vnd derselben verstand/ sinn vnd
meinung/ wo nicht drein flechten/ doch zum wenig-
sten damit beschönen vnd bementeln wil.

Wie können aber das S. Paulus oder Christus
leiden/ die sich sonst rund vnd deutlich erkleren/ das
sie bey dem Artikel der Gerechtigkeit vñ Seligkeit
des Menschen für Gott/ das geringste Werck nicht
haben wollen? Ist doch S. Pauli meinung oben
angezogen worden/ Das er sagt: Nicht aus den
Wercken/ ohne zuthun der Wercke/ etc.

D III

Wie

Wie solte er denn mit diesem Spruch wider
sich selbst streiten/ So man Bekent/ so wird man
Selig/ etc.

Darumb mus es nicht die meinung mit den
Worten Pauli haben/ das die Bekentnis nötig
zur Seligkeit sey/ als ein Werck/ ohne welchs man
nicht könnte zur seligkeit komen/ Wie D. Maiors
Reden/ Gute Werck seind nötig zur Seligkeit/
dahin mit ihrem natürlichen Verstande sich len-
cken vnd auslauffen. Welchen Verstand die Pa-
pisten/ als dieser Reden eigene Erfinder vnd ge-
wisse Interpretes vnd Ausleger in solchen Reden
finden vnd anziehen.

So seind des HERRN Christi Worte von
den Wercken der Knechte Gottes/ die sie thun/
auch klar vnd verstendlich genug/ Luce 17. Also
auch ihr/ Wenn ihr alles gethan habt/ was euch
befohlen ist/ so sprecht/ wir seind vnnütze Knechte/
Wir haben gethan/ das wir zuthun schuldig wa-
ren/ etc. Diesen Freuel vnd verschlagenen So-
phistischen Griff/ das er seine Papistische Reden/
vnter dem Mantel der Heiligen Schrift bedecken
wil/ kan man ja traum Doct. Maiorn/ auch so
schlecht nicht hingehen lassen. Denn es würde
letzlich dahin kommen/ vnd darzu gerahen/ Das
sich die Einfeltigen für dem falschen Papistischen
Wer

Verstande/der in viel gedachter Proposition Ma-
toris stercket / desto weniger würden hüten können/
ob sie gleich nicht die verdecktliche Proposition selbst
Sondern etwa andere/auch wol aus der schrifft/
vnter solchem schein angezogen / hören würden.
Wie denn D. Maior albereit die Wort sein ver-
wechseln kan/das er mit andern Worten eben auff
die Papistische meinung seiner Wort kömpt/des
hat man Exempel im vierden Theil seiner Home-
liarum/ in der Auslegung der Epistel auff den vj.
Sontag nach Trinitatis / am 149. Blat/da er
also schreibet: Saluandis Bona opera, seu nouæ obe-
dientiae inchoationem esse necessariam. Das ist/
Denen / die da wollen oder sollen Selig werden/
ist der Neue Gehorsam oder Gute Werck nötig.
Da es doch nach der Schrifft billicher also heissen
solte / Es kan niemand kein recht gut Werck thun/
er sey denn vorhin allein durch den Glauben Ge-
recht vnd Selig worden/ Wer da aber wil Selig
werden/dem ist darzu nur allein Christi Verdienst
von nöten / welchs nur durch den Glauben/ ohne
vnserer Werck vns appliciret vnd zugeeignet wird.

III. Das Dritte so noch mangelt/
ist/ Das er in seiner Bekentnis / vnd entlichen er-
klärung / so viel zuuerstehen gibt / ob er schon die
E Wort

Wort / Gute Werck seind nötig zur Seligkeit / vmb
des missdeutens vnd verkerens willen / wolle fa-
ren lassen / vnd nicht mehr gebrauchen / So wolle
er doch gleichwol den Sinn / wie er sie verstan-
den / vnd auch in seinen Schrifften / darauff er sich
auch noch berufft / im streit erkleret hat / behalten /
vnd mit andern Worten führen.

Was aber derselbige Sinn / vnd wie sich D.
Mator in seinen Streit-schrifften etliche mal vber
diese Proposition erkleret habe / das soll man aus
seinen eignen Worten hören / Vnd ist die summa
dauon / das er streitet / vnd sich also erkleret / Das
des Menschen seligkeit / nicht schlecht allein in dem
Glauben / sondern auch in den Wercken stehe / vnd
so jemand selig werden soll / müs er nicht alleine
Gleuben / sondern auch Gute Werck vnd die Ver-
newerung des Lebens darzu haben.

Diss ist viel geredt / vnd wirds Doctor Ma-
tor nicht gerne gestehen wollen / darumb mus man
hie weisen / wo es in seinen Büchern stehet.

Erstlich / streitet er hefftig / das ein vnterscheid
sein wolle / zwischen der Rechtfertigung vnd Se-
ligkeit / vnd vermöge dieses vnterscheids / könne
vnd möge er wol von der Seligkeit anders / denn
von der Rechtfertigung des Menschen reden. Al-
so schreibt er / das es von der Rechtfertigung des
Men-

Menschen für Gott vnrecht sey / das Gute Werck
zur Rechtfertigung nötig sein / Aber von der Se-
ligkeit sey es recht geredt / das Gute Werck zur
Seligkeit nötig sein.

Im Sermon von S. Pauli Be-

kerung. 2. 4.

Der selig ist / der mus das haben / das die Se-
ligkeit ist / Seligkeit aber in diesem leben ist
Vergebung der Sünden / vnd aufgefan-
ne Vernewerung / Derwegen ist vergebung der
Sünden / vnd angefangene Vernewerung / den
Gleubigen zur Seligkeit von nöten.

Ibidem E. 1.

Streitet D. Reator / das D. Lutherus lehre
vnd meinung sein solle / Das zur Seligkeit / oder
so jemandes solle selig werden / Zwen dieng nötig
seind / Erstlich der Glaube / vnd darnach ein willi-
ger Gehorsam gegen Gott.

Rursus ibidem, A. 2. G. 1. & 3.

Das ein Mensch die Seligkeit habe / gehören
diese stuck zu: 1. Busse. 2. Der Glaube. 3. Die
Vernewerung. Item / solch new leben / ist ein theil
oder stuck vnd anfang / des Ewigen lebens. Wie
soltten denn die Guten Werck den Gleubigen zur
Seligkeit nicht nötig sein.

E is

In

In Epistola ad Roman. fol. 54.

Die Seligkeit in diesem Leben / steht in Vergebung der Sünden / vnd in der Vernewerung des heiligen Geistes.

In jetziger seiner Repetition / sihet er auch auff diesen vnterschied / zwischen Gerechtigkeit vnd Seligkeit / da er spricht : Wenn ich gestritten habe / das Gute Werck zur Seligkeit nöttig sind / habe ich derunter nicht verstandē die Rechfertigung / Als wolt er sagen / Ich sage vnd halte noch / das ein vnterscheid ist / zwischen Gerechtigkeit vnd Seligkeit / Wir werden wol ohne Werck Gerecht / aber ohne Werck werden wir nicht Selig / sondern ist vnmöglich ohne Werck selig werden.

Es stehe nue vmb diesen vnterscheid wie es wolle / vnd ob auch gleich das wort SALVS Seligkeit / nicht allemal in der Schrifft pro Iustificatione / für die Rechtfertigung genommen vnd gebraucht / wirs auch an andern orten nicht streiten wolten / So mus Maior das bekennen / vnd vberzeugen in die Exempel / vnd viel klare helle sprüche / das die Schrifft solchen vnterscheid keines wegesehelt / Sondern gemeiniglich vnd am aller meisten die Wörter Gerechtigkeit vnd Seligkeit zusammen setzet (vnd sonderlich wo von der Rechfertigung gehandelt wird) von einem wie von dem andern redet.

Dar

Darumb stehen wider D. Maiors Lehre vnd Meinung, / gewaltig vnd deutlich / nachfolgende Sprüche S. Pauli Roman. 4. Deme aber / der nicht mit Wercken vmbgehet / gleubet aber an dem der den Gottlosen gerecht machet / dem wird sein Glaube gerechnet zur Gerechtigkeit. Nach welcher weise auch David sagt / Das die Seligkeit sey allein des Menschen / welchem Gott zurechnet die Gerechtigkeit / one zuthun der Werck / da er spricht Selig sind die welchen die Sünde bedeckt sind / Selig ist der Mann / welchem Gott keine Sünde zurechnet.

Hie ist ja klar / das S. Paul mit den Worten Gerechtigkeit vnd Seligkeit / nicht von zweierley vnterschiedenen dingen redet / Sondern nur von dem einigen / wie ein armer Sünder für Gott gerecht vnd Selig / oder von Sünden los gesprochen werde / Nemlich das ihm die Sünde bedeckt / nicht zugerechnet / vnd ohne zuthun der Wercke die Gerechtigkeit zugerechnet wird. So erkleret / beweiset vnd bestetiget S. Paulus mit deme / was er sagt von der Seligkeit / eben das / was er daneben / oder sonst redet von der Rechtfertigung / vnd schleust starck / das eines wie das ander geschehe / Gerecht werden / vnd Selig werden / Nemlich ohne zuthun der Wercke / das man nicht sagen kan / Das zu

einem oder zu dem andern die Wercke nötig sein.

Ephes. 2. Aus Gnaden seit ihr selig worden
etc. Nicht aus den Wercken/ etc.

Tit. 3. Es ist erschienen die Freundlichkeit vnd
Gütigkeit Gottes vnsers Heylandes/ nicht vmb
der Werck willen/ der Gerechtigkeit die wir gethan
hätten / Sondern nach seiner Barmherzigkeit
macht er vns selig/ etc.

Fürs ander / Ist auch am tage vnd offenbar/
das die Heilige schrift vnd sonderlich S. Paul die
particulas exclusiuas (aus Gnaden/ allein durch den
Glauben/ one Werck) nicht allein wenn sie von der
Rechtfertigung redet / Sondern auch/ wo sie der
Seligkeit gedencet/ klar setzet vnd stark treibet/ da-
mit die schrift zeuget / wie sie wil von der Gerech-
tigkeit oder Rechtfertigung des Menschen alle
Werck ausgeschlossen habē / Also wil sie auch keins
weges habē / leiden oder dulden/ das man die werck
in die seligkeit mengen/ oder von der selben sagē sol/
Das Gute werck zur Seligkeit also nötig sein/ das
es vnmöglich ist/ one dieselben selig zu werden/ oder
das auch niemand one Gute werck selig wordē sey.

Dauon betrachte man die aller neheste eingefür-
te sprüche Eph. 2. vnd Tit. 3. vnd diese nachfolgende.

2. Timoth. 1. Gott hat vns Selig gemacht/
vnd beruffen/ mit einem Heiligen Ruff/ nicht nach
vnsern

vnsern Wercken / Sondern nach seinem Fürsatz
vnd Gnade die vns gegeben ist in Christo Ihesu
für der zeit der Welt/ete.

Roman. 4. Das die seligkeit allein des Men-
schen sey / welchem Gott zurechnet die Gerechtig-
keit/ohne zuthun der Wercke/ etc.

Weil nu S. Maior in seinen schrifften nur vmb
seiner Proposition willen/ Guten werck sein zur se-
ligkeit nötig/ die oberzelte theilung braucht/vñ da-
mit die Werck vnd Glaubē in etānder menget/ als
ob vnser seligkeit nicht in dem glauben allein/ son-
dern auch auff den Werckē stünde/vñ in dem wider
klare sprüche der schriff leret/ So kan man ja auch
in diesem stück nicht mit jm zufriden sein/das er sol-
ches als recht vñ wol geredt vnd gethan/ stehen lest/
vnd vrsach darzu gibt/das aus seinē Büchern mit
der zeit (wie es den auch albereit angefangen wird)
die reine Lehre von der Gerechtigkait vñ Seligkeit
des menschen könne vnd möge/nach Papistischer
art vnd weise/ verkeret vnd verfelschet werden.

III. Zum vierdten mangelt es auch
daran/ das er die andern seine Propositiones als
gut vñ tüchtig behelt/nemlich Es ist vnmöglich on
gute Werck selig zuwerdē/ den niemand wird durch
böse werck selig. Item, Es ist niemand on gute werck

E iij

Selig

Selig worden. Gerade als weren diese Reden nicht aller dienge stracks wider die schrift / vnd hellen klaren Wort S. Pauli Roman. 4. Ephes. 2. Item wider vnser Augspurgische Confession / darin aus dem spruch Ambrosij / oben eingefüret / angezeigt / Das es also von Gott beschlossen ist / das wer an Christum glaubet / selig werde. ohne Werck. Dagegen Maior sagt / Es sey vnmöglich ohne Wercke selig werden / auch sey keiner ohne Gute werck selig worden. Sie mus ja ein jeder vernünftiger mensch bekennen / das eins wider das ander ist. Weil denn nu D. Maior dieser reden mit keinem Wort gedencet / dergestalt / das er sich so wol auff die selben / als auff die / das Gute werck zur seligkeit nötig sein / erkleret / oder erboten hette / dieselbigen als vnrecht / sampt der andern / hinzulegen vnd zuwerffsen. So mus es nicht in den Wind geschlagen / sondern wol gemerckt vnd behalten werden / Damit nicht darunter was schedlichers eingefürt werde. Weil diese beide Propositiones noch gefehrlicher vnd erger sein / denn eben die Erste.

V. Zum Fünfften mangelts daran / Das er auch etliche andere Glossen stehen lest / als weren sie recht / da sie doch stracks wider die schrift falsch

falsch vnd vnrecht sein/ Vnter denselben ist diese/
das er spricht: Gute Werck sind zur Seligkeit nö-
tig / Nemlich darumb/das sie die seligkeit erhalten.
Dauon besihe die predigt vber den spruch Johan.
1. Sihe das ist Gottes Lamb/ etc. E.8. Item/ im
grossen Sermon Anno 1553. gedruckt/ B 3. V. 1.
Item/ Z. 3. da er also schreibt: Die seligkeit/welche
man aus Gnaden durch den Glauben empfangen
hat / kan nicht ohne Gehorsam gegen Gott erhal-
ten werden. Merck alhie wie es zusammen stimme/
Anderwo schreibt er / das die seligkeit nicht allein
aus Gnaden komme/ es sein die Werck auch darzu
nötig. Hie schreibet er aus Gnade/Welches so viel
heist/ als ohne Werck. Item/ Y. 2. Durch den Glau-
ben vnd gute Werck wird die Gerechtigkeit vnd
Seligkeit erhalten.

Wider diese Glossa stehen nachfol-
gende sprüche.

Roman. 5. Darumb preiset Gott seine Liebe
gegen vns / das Christus für vns gestorben
ist/ da wir noch Sünder waren/ So werden
wir je viel mehr behalten werden/ für dem Zorn/
nach dem wir durch sein Blut versönet sind. Das
ist / wie vns allein der Todt/ vnd das Verdienst
Jhesu Christi mit Gott versönet / vnd Gerecht
F macht/

macht/wenn wir solchs durch den glauben ergreif-
fen. Also kan vns auch nichts anders für dem horn
Gottes in der Gerechtigkeit vnd Versöhnung er-
halten / denn eben dasselbe Verdienst vnd Blut
Christi welches wir im Glauben bewaren. Dar-
aus folget das es nicht wahr/vñ dem verdienst vñ
Blut Ihesu Christi zu verkleinerung geredt ist/das
vns die Wercke sollen in der Seligkeit erhalten.

1. Pet. 1. Die ihr aus Gottes macht (nota/
aus Gottes macht) durch den Glauben (rursus no-
ta) durch den Glauben nicht durch Wercke) behal-
ten werdet zur Seligkeit. Item / paulo post spricht
Sanct Peter So werdet ihr euch freuen mit Un-
ausprechlicher Freude/vnd das ende ewres Glau-
bens dauon bringen/nemlich der Seelen seligkeit.
Nota/ die Seligkeit heist das ende des Glaubens/
dauon das die Seligkeit allein auff dem Glauben/
vnd gar nicht auff den Wercken stehet / vnd durch
den Glauben erhalten wird. Denn wer Gleubet
der wird allein Selig.

Coloss. 1. Nu hat euch (Christus) versönet / mit
dem Leibe seines Fleisches / durch den Todt / auff
das er euch darstellte Heilig vnd Bussfertiglich / vnd
ohne Tadel für ihm selbst / so ihr anders bleibet im
Glauben / etc. Das ist auch klar gnug vom Glau-
ben geredt / vnd nicht von Wercken. Wer im glau-
ben

ben bleibet/ der wird erhalten / heilig vnd vnstreff-
lich ja lebt auch als ein Kind Gottes/ so viel als
in diesem leben möglich ist/ heilig vnd vnstrefflich.

Wo es auch wahr were das man durch Werck
die Seligkeit erhielte/ würden viel absurda daraus
notwendig folgen/ als eins/ das die particulæ exclu-
siuæ/ derer oben gedacht ist (wo nicht eben so wol
das beharren/ mittel vnd ende der seligkeit/ als der
anfang auff dem Glauben stünde) gantzlich fallen
vnd nichts nütze sein. Denn es würde nicht alles
allein bey dem Glauben bleiben / Sondern auch
bey den Wercken stehen/ welches die Schrift nicht
leiden kan / wie aus den erzelten Zeugnissen zuvor
genugsam erwiesen ist.

Zum andern/ Were auch S. Pauli argumen-
tatio Rom. 4. vergebens / da er also schleust: Der-
halben mus die Gerechtigkeit aus dem Glauben
kommen/ auff das sie aus Gnaden sey/ vnd die Ver-
heissung fest bleibe. Denn so die Verheissung/ das
empfangene Erbe der seligkeit zu behalten/ nachfol-
gent auff vnsern werckē stehen solte/ wie köntē wir
wissen/ was/ wieviel/ vñ welche werck darzu gehört
hätten. So were die Verheissung ja so vngewis/ als
vorhin/ ja es bliebe auch nit alles Gnade/ sondern
würde zum theil Verdienst/ weil die erhaltung auff
vnsern wercken stünde. Welchs abermal die schrift
gar nicht leiden kan.

§ ij Zum

Zum dritten/ Würde auch folgen/ das ein an-
der mittel vnd instrument were/ die Seligkeit zuer-
halten / denn das / damit man sie ergriffe/ Welchs
die Heilige schrift so wenig als die vorigen stücke/
zülest/ Sondern wie sie sagt / das man durch den
Glauben Selig werde / Also zeuget sie auch / das
man eben durch denselben Glauben zur seligkeit be-
waret / oder die seligkeit erhalten werde/ Vnd wo
es sich auch anders verhielte / das man durch die
Werck die Seligkeit erhalten müsse / so könnte der
Spruch nicht bestehen: Der Gerechte wird seines
Glaubens leben.

VI. Zum Sechsten mangelt es auch
daran / Das er in seinem Büchlein ad Romanos
fol. 86. den Irthumb einfüret / das wir vns die
Wolthaten Christi dueignen/ durch den Glauben
vnd Bekenntnis / vnd verstehet vnter der Bekennt-
nis / das ganze newe leben / Wie in Sermone de
Conuersione Pauli H. 4. vnd in Epistola ad Romanos,
Capite 10. fol. 84. zusehen ist. Item in eadem Epistola
Capite. 10. fol. 86. super verba hæc. Quomodo inuoca-
bunt eum, in quem non crediderunt? Supra docuit,
quomodo beneficia Filij DEI nobis sint applicanda, Fi-
de nempe, & Confessione, cum inquit: Corde credi-
tur ad iustitiam, Ore autem fit confessio ad Salutem,
&c. lu-

&c. Iustitia fidei est, Hoc verbum de filio DE I incar-
 nato pro nobis crucifixo, mortuo, resuscitato, habere
 in corde. 1. In eo lætari, acquiescere. 2. Ore cofiteri,
 propagare, docere. 3. Et propter hæc beneficia cele-
 brare Deum, ei gratias agere. 4. Et propter hoc verbū
 omnia extrema etiam mortem sustinere & pati. Das
 ist so viel gesagt / In der Epistel an die Römer am
 10. capittel / vber die wort: Wie sollen sie anruffen
 an den sie nicht gleuben / schreibt Aator also: Zu-
 vor hat der Apostel gelehret / wie die Wolthaten
 des Sohns Gottes vns zugeeignet werden sollen /
 Nemlich / durch den Glauben vnd Bekenntnis / Als
 er sagt: So man von Herzen gleubt / so wird man
 Gerecht / vnd so man mit dem Munde bekennet / so
 wird man Selig. Item / die Gerechtigkeit des
 Glaubens ist / das man dieses wort von dem Sohn
 Gottes / das er Mensch worden / für vns Gerech-
 tiget / Gestorben vnd Auferstanden / im Herzen
 habe. So weit gehet das erste / Das D. Aator
 ad iustitiam fidei wil gezogen haben. Folget das
 Ander. 1. Sich dessen frewen / vnd darauff beruhen.
 2. Dasselbige auch mit dem Munde bekenne / aus-
 breite vnd lehre. 3. Vnd vmb solcher Wolthaten
 willen Gott rühme vnd dancke. 4. Vnd von we-
 gen solches Worts / das aller eusserste / auch den
 Todt dulde vnd leide. Heist nu das nicht (Fides &
 Opera



Opera sunt Iustitia nostra) also viel. Glaube vnd
Werck seind vnser Gerechtigkeit? Was helfen
dem die Wort die hernach folgen / vnd wie rei-
men sie sich zu deme / das er jetzt geschriben hat?
Nemlich das er mit den Worten beschleust: Quod
qui facit, hic non ex lege & Operibus, sed ex verbo fidei
iustus & saluus est, Das der jenige / so solches thue /
nicht aus dem Gesetz vnd Wercken / Sondern aus
dem Worte des Glaubens / Gerecht vnd Selig
sey.

Das ist ja gar zu grob / Vnd gefehrlich in den
Articulum Iustificationis, gegriffen. Denn was hat
man bissher anders wider den Papst vnd seinen
ganzen anhang gestritten / Denn das vnser Er-
newerung vnd Wercke nicht in den Artikel der
Rechtfertigung sollen ein gemenget werdē. Item /
das die Applicatio geschehe / allein durch den Glau-
ben / Vnd nicht durch Glauben vnd Wercke.
Aus dieser ungercimpten Falschen Lehre / kompt
die gemeine Rede her / welche jekunder viel ge-
brauchen / Nemlich / hie auff Erden seind wir für
G. D. T. T. Gerecht vnd angenehme / Imputatione
& Inchoatione. Que heisset Imputatio, das vns
der Gehorsam vnd das Verdienst I. H. E. S. W.
G. H. X. I. S. E. I. / aus gnaden allein durch den
Glauben zugerechnet wird. Inchoatio aber heisset /
vnser

vnser angefangener Newer gehorsam/ Wil man
also reden / das wir für Gott denn Gerecht sein/
wenn Imputatio vnd Inchoatio / Das ist/ Die Zu-
rechnung des verdienstes **G H X Z S E Z** vnd
vnserer Vernewerunge zusammen kommen. So
ist dieser hoher Artickel von des Menschen Rech-
fertigung für Gott / schon verfelschet. Vnd ist
dieses keine Calumnia / Sondern der sachen ho-
he notturfft / das man für solchen sachen warnet.
Denn ob es schon war ist / vnd gar nicht verleug-
net wird / das beide Stücke der Versönug mit
G S E Z / vnd vnserer Erneuerung / Wohlthaten
G H X Z S E Z sein / vnd beides in den Glei-
bigen geschiehet / als das sie durch den Glauben
die Versönung fassen vnd ergreifen / vnd durch
den heiligen Geist erneuert werden. So mus man
doch solche beide stücke vnterschiedlich behalten/
vnd auch also dauon reden / das eins nicht in das
ander gemenget / oder beide zusammen in einen
Artickel gefasset werden. Denn des Glaubens
Gerechtigkeit stehet in diesem Leben / alleine in
Vergebung der Sünden / vnd in gnediger zurech-
nung des Gehorsams / vnd verdienstes **G H X Z**
S E Z. Rom. 4. Auff solche versönung folget dar-
nach die Vernewerung / Vnd gehört eins ad iustiti-
am personæ das ander ad iustitiam bonæ conscientia,

§ iij

Oder

Oder (das gleich soviel ist) eins zu der Rechtfertigung / das ander / welches Maior gar in einander menget zu den Guten wercken.

VII. Felet vnd mangelt es auch daran / Das D. Maior diese jetzt erzelten / vnd etliche andere Stück (welche wir vmb kürze willen vbergehen) gar stehen leffet / Sich darüber mit der aller höchsten betörung vnd beruffung auff Gottes crustes vnd letztes Gerichte / Keiner heilsamer Lehre rühmet / Vnd so bitter vnd heffig andere beschuldiget / das sie ihme mit vngrunde Falsche lehre züchtigten / Heisset sie / als oben erzelet ist / wie er zu rathe wird / vnd wie es ihm nach seinem gewulichen Zorn gelüftet / Vnd erkennet doch solches alles für keine Sünde viel weniger sucht er Versönnung / vnd bittet vmb verzeihung? Weil er denn nu darin / vnd in solchem fürnehmen verharret / So befelet man diese sache Gott dem Almechtigen / vnd bittet doch für D. Maiorn / das sich Gott sein erbarmen / ihm erkentnis seiner Sunde / vnd ware Bekerung verleihen wolle. Aber mit der Lehre / wie er sie gefüret / vnd jetzt angezogen worden ist / kan vnd mag man nicht zu frieden sein / Wie es D. Maior vnd etliche andere ohne Widerruff gerne wolten haben. Vnd müssen auch andere für dem /
was

was vnrecht / gefehrlich vnd verführlich ist / nicht
vngewarnet bleiben.

Weil denn nu D. Maiorn gar in dem gering-
sten nichstes zugetichtet wird / Sondern alles / was
man ihm schuld gibt / mit seinen eigen Worten ist
angezogen / Buch vnd Blat / wo es stehet / das es
ein jeder selbst suchen / lesen vnd dauon richten vnd
vurtheilen kan / geweisset vnd genennet / vnd dar-
nach gegen ein jedes klare helle / Schrift aus dem
Heiligen Apostel Sanct Paulo / der Augspurgi-
schen Confession / vnd D. Luthers Büchern gese-
zet / das man sehen könne / wie sich eins gegen dem
andern reime vnd schicke. So hoffen wir vnterthe-
nigst / vnd demütigst / das aus solchem allem / so
viel erkant / vnd befunden werden solle / Das wir
jha Erstlich keine Calumnien nicht gebrauchen /
Sondern mit D. Maiorn auffrichtig vmbgehen /
dieweil wir ihm sagen / wie wir die sache funden /
vnd wie wir sie selbst achten vnd halten.

Zum andern / das es auch nicht vmb geringe
vnd vnnötige dienge zuthun ist / die man so leicht
vergessen vnd hinstellen könnte / Denn es gilt hie
dem grunde vnsrerer Seligkeit / den sollen wir vns
ja nicht leichtlich verrucken lassen. Nu gehet aber
D. Maior mit demselben in den angezognen Re-
den selzam vnd wunderlich gnug vmb / das auffse-

S

hens

hens vnd warnens wol vunnöten ist. So ist es ja auch am Tage/ das in langer zeit vber keinem dinge so hefftige Verfolgung gewesen / als eben vber dieser Doct. Maiors Proposition / darzu er mit ein em grausamen Zetergeschrey wo er nur kan/ vnd die geringste gelegenheit bekömpft/ alle Sbrigkeit anreizet vnd treibet.

Zum dritten/ Das wir nicht sollen verdacht werden / die weil wir D. Maiorn vber so Hohen vnd wichtigen sachen einreden. Es ist vns (wie Gott weis) nicht vmb dancken zuthun / des wir gerne vberhaben sein wolten / die weil man vns ohne das alles zum ergesten auslegt / vnd darüber beschwerlich genug zuschret / Sondern das Gottes Ehre / die ware vnd reine lehre vnsern Kirchen erhalten vnd so viel möglich / auff vnserer liebe Nachkommen mit Göttlicher hülff gebracht werde. Vnd das wir vnser Gewissen vnbeschweret behalten / vnd vnser tewr befohlnes Ampt treulich verrichten mögen. Wo es ohne das were / wolten wir ja so gerne guten Friede / vnd der leute Gunst haben / als jemand anders.

Weil auch aus diesem allen ferner vermerckt / vnd verstanden wird / da vnser gemüt vñ meinung niemals gewesen / auch noch nicht ist / D. Maiorn zuschmehen vnd schenden / Wie er vns vnd andern /
ehit

ohn auffhören thut vnd gethan hat / Auch dieses
alles / was wir von D. Maiorn aus seinē Schrif-
ten eingeführet / niemand anders / denn ihm selbst
zuschreiben vnd zumessen / vnd also vmb seinet wil-
len / der Vniuersitet Wittenberg weder im bösen
vnd argen gedenccken / noch ihr etwas vngbürlichs
zugemessen haben / So geschiehet vns abermal
gar vngütlich / das wir den Namen / nachsage vnd
schuld tragen müssen / als solten wir der Schulen
vnd Kirchen lesterer sein / vnd ganzen Landen vn-
billich zumessen / was eine oder zwo Personen pri-
uatum disputiren / reden vnd schreiben. Es ist vns ja
solchs niemals in sinu komen / vnd wird sich in vn-
sern ausgegangenen Bekenntnissen anders befin-
den. Derwegen wir nicht vnbillich zum aller höch-
sten vnd vnterthänigsten demütig bittē / das man
vns solches beschwerlichen verdachts erlasse / vnd
mit so vngegrünter Beschuldigung hinförder
gnedigst verschonen wolle.

So fern haben wir angezeigt / was wir mit
den anfänglich benentten Zweenen Personen zu-
thun gehabt. Nu solten wir aber auch wol von
D. Petro Pretorio / welcher den Catechismum Lu-
theri verfelscht / des gleichen von Victorino etwas
sagen / weil aber Victorinus flüchtig / vnd zuvor in
den Schrifften / da auch des Synergismi vnd Adia-
pho-

phorismi gedacht / dauon gnugsame meldung ge-
schehen / lassen wir es jetzo aber dabey wenden vnd
bleiben. Denn wir doch wol verstanden / das es am
aller meisten derer beider Personen halben gesche-
hen / das man so ober vns vnmuts ist / von den wir
den Bericht haben thun müssen.

Wir wollen aber hie nicht vnterlassen zuerze-
len wie wir jetzt mit gedachter Vniuersitet Wit-
tenberg / oder viel mehr mit etlichen professorn da-
selbst stehen / vnd daran sein / vnd was vns fur fur-
ker zeit von denselben begegnet / vnd sonst schmerz-
lich / vnd beschwerlich fürkommen ist. Nicht der
meinung / das wir hiemit vnd noch zurzeit / eine of-
fentliche Accusation wider sie anstellē / oder jeman-
des aus vngrunde etwas zumessen wollen / Son-
dern das man auch erfahre / was sie für Hertz vnd
Gemüte zu vns tragen / vnd aus was Affecten ire
Beschuldigungen / damit sie vns gegen andere be-
schweren mögen / entstehen vnd herfließen.

Wie nue vnser viel in derselbigen Vniuersi-
tet Studieret / vnd von vnsern lieben Preceptoribus
die dazumal am Leben gewesen / vnterweiset
vnd gelehret worden / auch sie Hertzlich geliebet /
vnd nach vnserem vermögen geehret haben / Also
haben wir vns zu ihren Successoribus / vnd den an-
dern allen / die zum theil vnser Discipuli vñ Condi-
scipuli

scipuli gewesen / keins bösen viel weniger heimlicher
feindschafft / oder unwill. us versehen wollen. Aber
newlicher weile ist vns von ihnen der Schimpff
begegnet / das sie vns in ihrem Confessu publico, da
aus allen facultatibus, die Herrn Professores im
Consistorio zusammen komen sind / gewlich / vnd
auffß vbelste beschuldiget / für Verfärer / vnd fal-
sche Lehrer gehalten vnd angegeben / vnd vnsere
viel gedachte nechst ausgegangene Bekentnis / als
ein Laster vnd Lügenbuch verdammet / vnd ver-
worffen / Vnd nennen es nu etliche in ihrem schrei-
ben hönisch Librum condemnationum, Vnd haben
solch ihr iudicium von vnd ober vns damit erequi-
ret / das sie einen Studenten / mit Namen Georg
Weisser / aus der Schlesien von der Schweidnitz
bürtig / welcher zuvor in vnsrer Schulen zu Eiss-
leben etliche Jhar studiret / vnd auch darnach dar-
innen Gediencet hat / Als er gegen vergangnen
Herbst / des 1567. Jhars / vmb Promotion / vnd
gradum Magisterij angesucht / vnd gebeten / nur al-
lein darumb haben ausstossen / reisciren / vnd im al-
so Gunst vnd Föderung abschlagen wollen / das
sein Name gedachter vnsrer Bekentnis vnter-
schrieben gewesen. Vnd haben ihme mit solchem
Eruste zugesetzt / das sie ihn nicht allein mit Rele-
gation / Sondern auch sonst hart bedrauet / vnd

G iij

damit

Damit den Jungen unbedachtigen Menschen da-
hin gedrungen/das er aus Furcht vnd vnuerstand
solche Bekentnis hat verleugnen/vnd sich mit sei-
ner eigen Hand verpflichten müssen/das er ferner
mit vns / als Glacianischen Verführern (denn
solchen Namen sollé sie vns öffentlich geben) nicht
zuthun haben woll. So haben sie sich auch sonst
gegen die andern der vnsern ein theils / vngeach-
tet / wie stille sich dieselbigen gehalten / vnd ihres
Studirens friedlich gewartet/vmb vnser willen/
mit solcher Vnfreundlichkeit vermercken lassen /
das sie sich darüber von ihnen haben begeben müs-
sen / vnd des Schimpffs / der ihnen hette begegnen
mögen / nicht erwarten dürfen.

Aus welchem allem wir nue vtel billiger vber
die Herrn der Vniuersitet Wittenberg zu klagen
haben / das sie vns Vnerschuldeter vnd Vner-
kanter sachen / auch vnüberwiesen / lestern / schme-
hen / verdammen vnd feindlich hassen / denn das
vns ihrenthalben solchs zugemessen werden mag /
Vnd ist vns solches nicht wenig nachdencklich von
ihnen / dieweil wir bey vns nicht finden können /
das sie zu solchem geschwinden vnd vnchristlichen
fürnemen gegen vns / vnd die vnser (sonderlich die
Jugend / die inen zu vnterweisen vertrauet wird)
einige erhebliche vrsach haben.

Denn

Dem was unsere Bekenntnis anlanget / die
sie obgedachter masse / so beschwerlich verlestern
vnd verdammen / So ist erstlich das war / das sie
der Vniuersitet / vnd Kirchen zu Wittenberg /
zu keiner verkleinerung gestellet / vnd in Druck ge-
geben worden ist . Wie solchs aus unserm vorge-
henden Bericht gnugsam zubefinden / So seind
auch die vrsachen vnd unsere meinung vnd gemü-
te / der Publication halben / in der Vorrede für
der Bekenntnis angezeigt vnd eröffnet.

Zum Andern / hoffen wir nicht / das vns aus
derselbigen einige / auch die aller gerinste Ver-
fälschung reiner Heilsamer Lehre / welche Gott in
den letzten zeiten / widerumb durch seinen Trewen
vnd hochbegnadeten Kistzeug D. Martin Lu-
ther / vnd andere seine getreue Gehülffen / eben
zu Wittenberg an tag gegeben / vnd in die ganze
Welt ausgebreitet / wird zugemessen oder angezei-
get werden können . Denn wir ja kein andere mei-
nung derselben Bekenntnis / weder new eingeführ-
te Reden / Lehren vnd Irthumb gestellet vnd an
tag gegeben / denn das wir solch heilig Depositum
vnd gute Beilage schützen / den vngebreuelichen
reden vnd irthumen widersprechē / vnd bey empfan-
gener reiner lere sampt den unsern verharren / vnd
diese vnuerrückt behalten möchten . Da auch etwas

G iiii

darin

Darin dafür gehalten würde/ als solte es der Warheit nicht ehulich sein / vnd von der empfangenen reinen lehre abweichen/ möchten wir gar wol leidē/ ja wir haben auch oft vnd viel geflehet vnd gebeten/ das vns solchs mit gebürlicher bescheidenheit/ ohne Sophistery priuatim oder publicē wie mans gleich thun wolte/ zuuerstehen gegeben würde. Wir werē alle zeit bessern bericht/ aus grund der schrift zu folgen erböttig / willig vnd bereit/ vnd solte ob Gott wil / bey vns keine verstockte vnd mutwillige verharrung in einigem Irthumb gespüret vnd befunden werden.

Zum dritten/ So haben wir dieselbige vnser Schrifft neben etlichen Brüderlichen vermanungen auch wider die schedlichen Irthumb der Sacramentirer / der Antinomer/ vnd neuen Pelagianer/ am meisten gerichtet/ vnd derselben Falsche Lehren / mit Gottes wort/ vnd gedachtes Manns Gottes D. Luthers Schrifften widerleget.

Weil denn nu solches alles von der Vniuersitet/ vnd den Herrn Professorn zu Wittenberg/ nicht geachtet / Sondern so geschwinde verdammert / vnd wider solche vnser Lehre/ Brüderliche Vermanung / vnd wolgemeinte trewe Warnung für den bekanten vnd zuuor auch durch sie selbst verworffene Irthumb / solcher gestalt procediert/ wird/

wird / wissen wir nicht / was wir letztlich anders
daraus verstehen oder abnehmen könnten / Denn/
das sie dieselben Irthume ungestraft / vnd sich de-
rer theilhaftig gemacht haben / wolten / welches wir
zwar nicht gerne von ihu dencken oder schreiben
wolten / wenn sie vns nur nicht mit solchem ihrem
Verdammen / vnd andern fürnehmen / darzu grof-
se vnd alzu viel vrsachen geben. Denn was gleich-
wol solchen verdacht wider sie mehre. vnd die sache
schier mehr denn zuviel gleublich mache / ist numehr
so gar verborgen vnd heimlich nicht.

Weil wir aber diese ganze Schrift / vmb
blosses Berichtes willen gestellet / So bitten wir
beschließlich / Demütig / vnd vmb Gottes willen /
man wolte es auch alles im besten von vns verste-
hen vnd annehmen / vnd den Sachen in Gottes
Furcht Christlich nachdencken. Vnd wo nicht
mehr / doch nur das einige daraus erkennen / das
vns mit den beschwerlichen Auflagen / vnd vn-
freundlichen Verdacht / zuviel geschehen / in deme
man vns dafür helt / vnd mit Bedreuwlichen Zor-
nigen Schrifften fürwirfft / Als solten wir so gar
Böse vnd Unbedechtige Leute sein / die nichts
denn Zancken suchen / Lust hetten andere zuschme-
hen vnd Vnehren / Zimmer im Hader zu liegen /
vber den diengen zustreiten / daran nicht viel geles-
gen /

S

gen /

gen/ Summa/ die keinen Christlichen Friede ha-
ben/ noch leiden wolten/ denn es wird ja aus vnse-
rer erzehlung das widerspiel befunden werden.

Wir wünschen auch nichts begierlicher/ vnd
mehr von Herzen/ denn das es ein mal dazu kom-
men möchte/ das ein rechtschaffen vnuerdechlich
Kirchen Iudicium, oder ein freyer Christlicher Syn-
odus angestellet würde/ darin diese vñ alle ande-
re streitige Sachen/ zu ordentlicher Erkentnis ge-
bracht/ vnd eins jeden theils Lehren vnd Schriff-
ten/ nach dem Göttlichen Worte examiniret wür-
de/ So solte sich ob Gott wil/ viel finden/ das man
jetzt nicht denckt/ noch gerne hören/ oder glauben
wil. Das were auch der beste Weg/ Friede zuma-
chen / vnd vnnötige Gedenc/ mit gebürlichem
Christlichem Ernste zusetzen. Denselben
wolle der frome Gott ihm zu Ehren/ vnd
erhaltung seiner Wahrheit/ selbst gne-
diglich vnd balde fördern/

A M E N.



Gedruckt zu Eisleben/ durch
Andream Petri.

Faint, illegible text, likely bleed-through from the reverse side of the page.

Geheimlich zu halten
1711




17/1791



Xa 2991 011

X2207170

11



B.I.G.

Farbkarte #13

QR 129 (86)

II, 614

2

Bericht / der Prediger
in der Graffschafft Mansfeld / Der Ir-
rungen halben / so zwischen ihnen / vnd etlichen Ge-
larten / in Vniuersiteten / vnd sonst sich zuge-
tragen / Auch worinnen / vnd wie fer-
ne sie mit denselbigen
streitig.



M. D. LXVIII.

Heine Post.
Erdbeere
1870

33

